

陽曲縣志

卷之十三

人物列傳

人物列傳

陽曲縣志卷十三

國所與立惟賢是依苟無人焉何以能國陽曲爲晉首邑唐宋以前遷徙不常其以太原晉陽并州志者必別其地固不敢漫指爲邑人也是以所登從畧自金以迄元明其間德行學問經濟勛業以及孝友節義載於史乘者則固彬彬矣邇來科第連綿人文蔚起外忠於國內孝於親砥節勵行魁梧奇偉之彥表表著名於世者更復不少採而志之以爲後起矜式

列傳之有題目如漢書儒林循吏等名蓋事重於人之義也

陽曲縣志

卷十三

人物列傳

一

方志仿其例而編之未爲無當第史傳之先後約畧以代次非先以人物爲總門而於其下又區類分編使時代割裂人物紛糾致難考索今仍用政畧之例一以年代爲次而以人物列傳統之其中何者忠烈何者治行何者孝義何者文苑讀其傳自可一覽而詳別焉

**周竇** 犇字鳴犢趙簡子之臣也按史記簡子嘆曰雀入海爲蛤雉入淮爲蜃唯人不能化哀夫竇犇曰臣聞君子哀名之不令不哀年之不登夫中行范氏不恤庶難而欲擅晉國今其子孫將耕於齊人之化也何日之有今邑之西北

烈石山有竇犇祠禱雨多應

**後漢**郭淮字伯濟舉孝廉除平原府丞事魏爲司馬破隴西名羌按撫柔氏三十餘落梁元碧等率種落二千餘家附雍州遷征西將軍都督荆梁諸軍事終車騎將軍進封陽曲侯

淮弟配字仲南位至城陽太守子展字泰舒有器度幹用歷職著績終太僕豫字泰寧相國參軍早卒配弟鎮字季南謁者僕射鎮子奕別有傳

府志

**晉**郭奕字泰業少負重名山濤稱其高簡有雅量初爲野王

陽曲縣志

卷十二

人物列傳

二

令太康中爲尚書

郭澄之少有才思機敏過人劉裕引爲相國參軍從裕北伐旣克長安裕意未足澄之西向誦王粲詩曰南登霸陵岸回首望長安裕意遂決乃曰當與卿共登霸陵岸耳後封南豐侯

**齊**劉貴剛格有氣仕齊官御史中丞加開府行臺僕射卒贈太保諡忠武

**北齊**白建字彥舉初入大丞相府任騎兵曹典執文帳明解書計爲同局所推天保末兼中書舍人孝昭輔政除大丞

相騎兵參軍河清三年突厥入境代忻二牧馬數萬匹在五臺山避賊賊退敕建送馬定州建以馬瘦遂違敕散付軍人戎馬無損建有力焉武平未歷尚書特進中書令封高昌郡公父長命贈開府儀同三司都官尚書建勤於在公以溫柔自處與唐邕俱以典執兵馬致位卿相世稱唐白武平七年卒贈司空

通志 府志云白建太原陽邑人案陽邑屬太谷非陽曲也備考

**後周**郭彥父印令靈武彥少知名以功累遷龍門伯除兵部尚書閔帝時出爲澧州刺史會蠻獠爲梗農業寢廢彥勸以耕稼人皆力本倉庾充實無轉輸之勞進爵懷德縣公

陽曲縣志

卷十二

人物列傳

三

**北周**冀儁字僧儁善隸書太祖引爲記室世宗二年以車騎大將軍爲大使巡歷州郡察風俗理冤滯還拜小御正尋出爲湖州刺史性恬靜每以清約自處所歷皆有聲稱進

爵昌樂縣侯 一統志

**唐**狄仁傑字懷英舉明經性至孝嘗赴并州法曹登太行山見白雲孤飛曰吾親舍其下悵望久之而去同府參軍鄭崇質母老且病當使絕域仁傑請代行長史蘭仁基義之常曰北斗以南一人而已爲魏州刺史禦寇有方民立生祠祀之爲江南巡檢使奏毀淫祠千七百所惟存夏禹泰

伯季札伍員四廟尋以地官侍郎同平章事聖歷初詔宰相各舉尚書郎一人仁傑薦子光嗣以稱職聞武后曰卿可謂祁奚內舉得人矣卒之周旋則天之側取日虞淵反周爲唐成再造之功中宗復位追進梁國公諡文惠

狄光嗣仁傑子聖歷初爲司府丞詔宰相舉尚書郎一人仁傑薦光嗣拜地官員外郎以稱職聞后喜曰祁奚內舉果得其人歷淄計貝三州刺史母喪奪爲大府少卿固讓睿宗嘉其誠許之累遷楊州長史貶歙州別駕卒

狄光遠仁傑子傑爲來俊臣誣搆下獄以帛書置褚衣中  
陽曲縣志 卷十二 人物列傳 四  
付家光遠得書上變武后乃召見仁傑同時被誣者七族皆貸

狄兼謩仁傑族曾孫剛正有祖風文宗朝爲御史中丞帝曰御史臺朝廷綱紀一臺正則朝廷治矣官至尚書左丞狄煥字子炎梁公仁傑之後隱於南岳有詩名

郭震字元振其先本陽曲人大父令湯陰因家焉震少有大志十六與薛稷趙彥昭同爲太學生家嘗送資錢四十萬會有縲服者叩門自言五世未葬元振舉與之無少吝亦不質名氏十八舉進士爲通泉尉任俠使氣武后召欲

詰旣與語奇之索文章上寶劔篇后覽嘉歎詔示學士李嶠等卽授右武衛鎧曹參軍進奉宸監丞會吐蕃乞和其大將論欽陵謂罷四鎮兵披十姓地乃以元振充使還上疏陳利害甚切后然其計後數年吐蕃誅欽陵而其弟贊婆等來降因詔元振與河源軍大使夫蒙令卿率騎往迎授主客郎中久之突厥吐蕃聯兵寇涼州后方御洛城門宴邊警遽至因輟樂拜元振爲涼州都督卽遣之初州境輪廣纔四百里虜來必傳城下元振始於南峽口置和戎城北磧置白亭軍制東要路遂拓境千五百里自是州無

陽曲縣志

卷十二

人物列傳

五

虜憂又遣甘州刺史李漢通關屯田盡水陸之利稻收豐衍涼州粟斛售數十千至是疋易數十斛支廩十年牛羊被野治涼五歲夷夏畏慕令行禁止道不舉遺河西諸郡置生祠碣碑頌德神龍中遷左驍衛將軍安西大都護西突厥酋烏質勒部落盛疆欵塞願和元振卽牙帳與計事會大雨雪元振立不動烏質勒會罷卽死其子婆葛以元振計殺其父謀勒兵襲擊副使解琬勸夜遁元振不聽堅卧營明日素服往弔道逢婆葛兵虜不意元振來遂不敢逼揚言迎衛進至其帳脩弔贈禮哭甚哀爲留數十日

喪事娑葛感義更遣使獻馬五千駝二百牛羊十餘萬詔元振爲金山道行軍大總管烏質勒將闕啜忠節與娑葛交怨屢相侵而闕啜兵弱不支元振奏請追入宿衛徙部落置瓜沙澗詔許之闕啜遂行至播仙城經畧使周以悌教以重寶賂宰相無人朝請發安西兵導吐蕃以擊娑葛求阿使那獻爲可汗以招十姓請郭虔瓘使拔汗那蒐其鎧馬以助軍闕啜然之卽勒兵擊于闐坎城下之因所獲遣人間道齎黃金分遺宗楚客紀處訥元振上疏力陳其不可不省楚客等因建遣攝御史中丞馮嘉賓持節安撫

闕啜以御史呂守素處置四鎮以牛師獎爲安西副都護代元振領甘涼兵召吐蕃併力擊娑葛娑葛怒卽發兵出安西撥換焉耆疏勒各五千騎時闕啜在計舒河與嘉賓會娑葛兵奄至擒闕啜殺嘉賓又殺呂守素於僻城牛師獎於火燒城遂陷安西四鎮路絕元振屯疏勒水上未敢動楚客復表周以悌代元振且以阿史那獻爲十姓可汗置軍焉耆以取娑葛娑葛遺元振書且言無仇於唐而楚客等受闕啜金欲加兵擊滅我故懼死而鬪且請斬楚客元振奏其狀楚客大怒誣元振有異圖召將罪之元振使

子鴻間道奏乞留定西士以悌乃得罪流白州而赦娑葛  
睿宗立召爲太僕卿將行安西酋長勞面哭送旌節下玉  
門關去涼州猶八百里城中爭具壺漿歡迎都督嗟歎以  
聞景雲二年進同中書門下三品遷吏部尚書封館陶縣  
男先天元年爲朔方軍大總管築豐安定遠城兵得保頓  
明年以兵部尚書復同中書門下三品元宗誅太平公主  
也睿宗御承天門諸宰相走伏獨元振總兵扈上事定宿  
中書十四日乃休進封代國公實封四百戶賜一子官物  
千段俄又兼御史大夫復爲朔方大總管未行會講武驪

山旣三令上親鼓之元振遽奏禮止引坐燾下劉幽求張  
說扣馬諫曰元振有大功雖得罪當宥乃流新州開元元  
年上思舊功起爲饒州司馬道病卒年五十八十年贈太  
子少保元振雖少雄邁及貴居處儉約手不置書人莫見  
其喜愠建宅宣陽里未嘗一至諸院廡自朝還對親欣欣  
退就室儼如也距國初仕至宰相而親具慶者唯元振云  
新唐書贊元振功顯節完一跌未復世恨其早歿云  
通志  
辛異隋文帝時避仇徙榆次大姓鞠氏見而奇之妻以女  
致貲累萬大業末饑異出穀數千賑邑中其妻謂曰天下



方亂丈夫不因時取功名乃安坐鄉里乎異曰吾心也顧未見可適者乃去謁楊元感決其無成復歸太原後從唐高祖起義兵軍用不足異毀產以資行師武德中累功爲千牛衛將軍突厥爲邊患以異爲夏州刺史禦之有惠政遷雲中都督卒

劉昌裔幼莊重不好戲及壯入蜀說楊惠琳順命及惠琳拜廬州刺史署昌裔爲州佐曲環攻濮州表昌裔爲判官代環檄李納曉以大義累進營田副使環卒吳少誠引兵薄城昌裔勸上官說堅壁不出因募突將暗出擊之賊走

陽曲縣志

卷十二

人物列傳

八

城賴以全尋以軍中推詔檢校工部尚書代節度使劉縱陳許軍節度使昌裔子爲光祿主簿學於樊宗師士大夫多稱之

**後唐**張丕尚節氣李克用鎮太原多選富家子主帑庫或調度不給卽坐誅沒入貲產丕爲之滿歲府財有餘宗人政當次補其任率族屬泣拜請丕濟其急丕又爲代掌一年鄉里服其義孫穎晉安州防禦使曾孫永德

**宋**張永德事繼母以孝聞周世宗時爲樞密表授供奉官押班歷遷殿前都指揮使周漢戰高平永德勵兵奮進大捷

征南唐敗劉仁贍破列砮十八處吳人發樓船蔽江永德  
夜使習水者沒船下糜以鐵鑊船不得進引輕舸急擊溺  
者甚衆吳平授檢校太尉宋太祖卽位討金陵征契丹下  
并汾永德功居多封衛國公卒贈中書令

呼延贊以積功累官康州團練使性忠勇徧文其體爲赤  
心殺賊字至於妻奴僕使皆然諸子耳後別刺字曰出門  
忘家爲國臨陣忘身爲主

邊光範字子儀性謙退和易雅有吏才父仁嗣忠武軍節  
度副使光範後唐天成二年起家榆次令召爲殿中丞賜

緋長興四年改太常丞晉天福初授檢校戶部員外郎北  
京留守判官兼侍御史二年拜大府少卿尙書請選刺史  
以蘇民瘼不報出帝時累遷給事中使亳州括借軍糧稱

允漢初檢校刑部尙書衛尉卿上言伏見朝廷除刺  
史不限年月或未及期年又聞除代往來跋涉豈暇撫懷  
望慎選良牧立定年限以責輯綏之效又不報周廣順申  
爲禮部侍郎將及秋試言於執政曰他曹公事光範不敢  
辭若處文衡校閱名賢品藻優劣非下走所能及期辭疾  
不出時論多其自知世宗初改刑部侍郎權知開封府俄

遷戶部顯德三年檢大名民田五年普均租稅光範詣宋州韓通言其均平世宗嘉之宋初征澤潞命爲前軍轉運計度鄭洛汝孟懷芻糧拜太常卿簽判吏部選事建隆四年權知襄州路當衝會餉饋無缺人不知勞五年兼橋道使以州卒代民官給器用役不淹久人以無擾詔書褒美開寶四年復判吏部銓曹尋判御史臺事數月眞拜中丞六年以疾辭銓任卒年七十三光範性至孝嘗吮母疽景德中錄其孫易從同學究出身

狄棐字輔之唐相仁傑後徙長沙少以文謁路振振器愛

陽曲縣志

卷十二

人物列傳

十

之妻以女舉進士甲科以大理評事知分宜縣歷開封府司錄爲寇準所薦通判益州擢開封府判官歷京西益州路轉運江淮制置發運使累遷太常少卿知廣州加直昭文館代還不以南海物自隨人稱其廉拜右諫議大夫龍圖閣直學士權判吏部流內銓出知滑州進給事中徙天雄軍坐士卒不戢降知隨州徙同州勾當三班院進樞密直學士歷知陝鄭州河中河南府復判流內銓出知楊州未行卒棐在河中有中貴人過郡言將援棐於上前棐答以他語退謂所親曰吾湘潭一寒士今官侍從可以老

自汙耶其爲政愷悌不爲表襮卒之日家無餘貲子遵度  
狄遵度字元規少穎悟篤志於學每讀書意有所得卽仰  
屋瞪視人呼之弗聞也以父廕爲襄邑縣主簿居數月棄  
去好爲古文著春秋雜說多所發明嘗作擬冊皇太子文  
除侍御史制裴晉公傳人多稱之尤嗜杜甫詩一夕夢甫  
爲誦世所未見詩及覺僅記十餘字遵度足成之爲佳城  
篇後數月卒有集一十二卷

王安中字履道世所稱初寮先生者也由進士起家敷歷  
臺省政和中爲尚書左丞時蔡京方居宰府有徐裡者增

廣鼓鑄之說以媚京公劾止之旣而京引方士以惑上公  
復上疏言並奏京欺君僭上蠹國害民數事直詞正氣震  
動一時公之子辟章出守泉州亦以政事著聞泉州之子  
秬往來盱江樂其水土之衍沃遂徙家焉至其六世孫伯  
昭締室麻姑山下著書藏修其中以樂先生之道嘗出戶  
見夫林巒之蒼潤煙霞之卷舒輒北向泫然流涕曰是山  
信美矣吾其敢忘恒山乎恒山先世之所居也其杖履遺  
馨固在也於是名其室曰恒山精舍浦江宋文憲公濂爲  
記之曰伯昭學贍而文雄每試輒冠軍大江以西未能或

之先也其爲人俊偉磊落又有燕趙奇男子之風異時立朝勁氣直辭必將無愧前人記有之樂樂其所自生禮不忘其本伯昭蓋深達禮樂之原者能不致謹於斯乎其以恒山名其舍蓋亦猶王虬自江左遷汾水之曲其家廟坐必向東南以示不忘先德之意且汾水陽曲皆并州境安知其初不出於一族乎

舊志俱遺據宋景濂集中補入

**金**段德祥慈祥樂易遇事果敢金主聞其賢召至奇其狀貌授定襄縣主簿兼本縣尉

**元**馮純舉進士爲河南行省平章封魏國公子思溫累官彰

陽曲縣志

卷十二

人物列傳

十二

德路總管封晉國公孫本官翰林檢討

王守誠泰定初進士由秘書郎累官至禮部尙書與修宋遼金三史至正間使四川舉直錯枉爲諸道最進行省左丞卒諡文昭

馮恩通經籍敦行誼蒞官嚴明善理冤抑累官御史中丞集賢院大學士

**明**楊憲字希武少從父官江南遂家焉太祖克集慶憲進謁與語悅之留居幕府嘗使張士誠被留踰年還除博士諮議擢江南行省都事軍國事文案填委憲裁決如流上益

親信久之出爲浙東行省郎中往諭方國珍國珍來附饒州降命偕理問穆燮總理軍務張定邊陷城憲走還尋進按察使遷中書省參議又出爲江西行省參政召爲司農卿浙西田賦畝加二倍額遂定旋參政中書省洪武元年冬改御史中丞詔定律令多深文憲美姿容有才辨能逆知上意又熟典故人謂莫已若多紛更省中事押用一統山河字又構誅參知政事張景暉御史劉炳等劾罷丞相汪廣洋又劾炳劾刑部侍郎左安禮等八人李善長劾憲排陷大臣窮盡其罪辟之初憲與劉基善上愛憲欲相之

陽曲縣志

卷十二

人物列傳

十三

基力言不可上怪之基曰憲有相才無相器夫宰相者持心如水以義理爲權衡而已無與者也憲則不然

通志

周瑄字廷玉宣德乙卯舉人入太學授刑部主事讞獄明審奉命錄南北畿重囚所至多平反景泰初遷郎中時獄囚八百天暑多病瑄三日盡發遣之擢右侍郎奉勅賑順天河間二府飢民因上裁冗官停徵糧等七事上嘉納焉又因旱禱雨人稱爲侍郎雨成化乙丑遷右都御史總督南京糧儲時南京粟貴請發粟賤鬻之民得以安是歲陞南京刑部尚書告戒諸司非會勘不得出五日以是無滯

獄甲午以考滿乞致仕章再上得允年七十餘卒諡莊懿  
贈太子少保

·黃禮正統間爲新城縣丞持正愛民有田爲水所沒不堪  
耕種者奏請除租民受其惠

申綱景泰癸酉舉人工詩文選監察御史有直聲出按河  
間等處奸貪望風屏迹歷知松江九江二府兩郡士民尸  
祝之家無厚產清貧自甘有故屬吏劉宇嘗餽以金綱峻  
却焉後字爲冢宰念綱清苦寓書臺使者月餽錢米綱不  
受

陽曲縣志

卷十二

人物列傳

十四

韓彰字默庵景泰庚午舉人任池陽推官復補延安左遷  
山東布政司理問歷官二十餘年清白儉約開釋不辜所  
全活甚多及歸田僅攜所歷俸資每置酒延親故會歲祲  
捐貲賑族黨以貧終其身

王璟景泰癸酉舉人成化初授濟南府同知以能吏稱擢  
知本府陞參政所至有惠政轉南京光祿寺卿璟天性孝  
友俸資悉與父母兄弟共人高其義卒贈工部侍郎

周經字伯常瑄子天順庚辰進士官翰林遷春坊中允侍  
泰陵東宮講文華大訓東宮每起立拱聽弘治二年擢禮

部右侍郎條奏皆傳經義改吏部却西域貢獅毀黃村尼寺靈壽人以民田獻太監李廣經會諸司奏奪田歸民八年諸大臣以災故上言屬經草疏語甚切直時有傳踪跡此書出誰手者耿尙書曰疏名首吏部裕實具草經曰疏草本出經卽有罪罪經十年陞戶部尙書凡諸王府及近戚貴幸有所請乞悉裁以法給事中魯昂請括諸藩積貯羨銀盡輸太倉經言國用不足宜儉於國不宜朘於民織造賞賚齊醮土木之費不節柰何括天下財歸京師給事中言非是中官傳旨取太倉銀三萬兩爲燈費經謂不可

陽曲縣志

卷十二

人物列傳

十五

以小民脂膏供耳目之玩疏寢之內靈臺奏增洒掃卒當給月廩經再疏竟不與修清寧宮調役山東七千人經曰山東歲歉民貧民不可輒動請以戶部羨銀僱役十三年致仕康陵卽位起南京戶部以憂去正德三年起禮部尙書卒贈太保諡文端弟紘成化戊戌進士山東右布政使長子孟湖廣漢陽知府次子曾弘治丙辰進士浙江布政司左參議姪伊晉州知州孫元祐中書舍人元祉西安府教授

張頤字養正其先江都人占籍太原衛天順四年進士翰



林院庶吉士累陞都察院右僉都御史巡撫宣府時太監汪直北征頤以軍功轉左尋陞工部右侍郎成化癸丑致仕弘治間卒頤有才氣平居持論侃侃而急功名士論惜之

通志

王瑞成化戊子舉人授丹陽知縣時有勢家豪橫瑞繩之以法抵死丁父憂改補獻縣有外戚奪民田瑞以計給之民田得還豪右悉斂迹焉

縉字朝用成化己丑進士授鈞州知州補滄州遷南京工部郎中出爲杭州府知府節縮浮費省民錢十餘萬遷

陽曲縣志

卷十二

人物列傳

十六

參政都御史劉大夏治河漲秋委令調度河左右悉其利築南望東堤令運卒得於水漲時分道並挽晉通政司右通政尋擢右僉都御史巡撫真保二府轉右副都御史巡撫宣大胥有保障績改督漕運值歲荒奏留米十萬石賑饑人入爲戶部左侍郎晉南京戶部尚書以不附逆瑾致仕旋復與尚書韓文同下詔獄又以前奏請改兌爲擅更祖制除名瑾誅起補都御史督漕如故兼勦淮南盜奏捷賜璽書褒勞已而力請致仕得旨晉南京戶部尚書歲給夫米如故縉起州郡洊歷臺省在滄州將去任民

攀卧泣留繼以入議經其地歡呼迎馬首者絡繹不絕後  
因家焉卒年八十三著有玉雪遺稿及奏議若干卷  
王佐成化辛卯舉人授合水知縣撫字勤勞吏畏民服歷  
八年惠愛日隆致仕歸士民感恩

陳璧字瑞卿成化壬辰進士知嘉興武邑二縣性抗直不  
折節權貴以績最擢監察御史益厲風采巡按山東辨太  
保劉珣獄進山東兵備副使臨清爲漕河所經要衝之地  
凡百需蠹弊璧一切裁省有貴璫貪贖於民璧折以法璫  
恚怒擊其首竟莫能奪尋遷按察使禁罰贖繩貪墨奸猾

陽曲縣志

卷十二

人物列傳

十七

斂戢不敢弄手僉事某爲御史時有隙及卒璧傾貲斂之  
不念舊怨陞南京太僕寺卿三年轉右副都御史整飭薊  
州等處邊務兼撫順永三府尋以疾歸璧性孝友事兄如  
父嘗以御史居家因微譴受兄朴絕無難色此尤不可及  
云

杜綦成化庚子舉人授碭山知縣改城固陞南京刑部主  
事時逆瑾勢傾中外凡晉秩者皆厚遺謁謝綦獨不行啣  
之僅數月奪其官瑾伏誅起擢員外郎以年老乞歸鄉評  
重之

唐希介字景賢三歲知字十歲能爲經義時稱奇童登成化丁未進士授庶吉士改工科給事中奉命省視眞定等處儲備希介親閱盡得夙弊以聞於是權倖嫉之中以他事謫四川石砭宣撫司經歷希介怡然就道旣蒞任檄署仁壽雙流二邑植善除惡俗用丕變又檄視州茶政巨猾斂迹遷知楊之通州靖盜修堤民賴以安擢陝西按察司僉事未幾改四川尋陞陝西榆林兵備副使時軍府多贏積中官欲私取之希介不可中官搆逆瑾矯制逮希介其子擊登聞鼓訟寃始釋

陽曲縣志

卷十二

人物列傳

十八

崔侃弘治庚戌進士歷官保寧府知府操守廉介政聲大著有疑獄久未決者悉廉得其情而申雪之時流賊齊趙輩劫掠四出聞侃忤逆瑾得請歸田遂引衆避他邑一方賴免祀蜀名宦祠家居卅餘年杜門不出糞粥自甘有同年友爲晉左轄憐其貧欲濟之會宗室請封覆勘事故難之示意曰若識崔介庵乎隻字來事濟矣有事者持金求刺卒不納著有介庵集

陳璘字邦瑞宏治癸丑進士除太常博士選監察御史巡居庸諸關再按山東脩闕里孔廟上遣官立御製碑文特

嘉其績遷浙江僉事尋轉陝西苑馬少卿少師楊總制三邊薦其賢遷參政督軍餉邊儲大足而民稱便轉河南按察使時豪猾結交宗室多行不法及發覺率隱匿宗室家璘下令自今敢匿人者連坐捕獲悉正其罪境內肅然鎮守王太監貪殘特甚璘面責之王遂自戢陞右布政轉左布政擢都御史巡撫湖廣以邊才改延綏繕城堡利器械足倉廩募戍兵選將官以斬獲功蒙敕諭獎勵又以邊牆功蒙賜金帛又以大斬獲功蒙賜蟒衣三襲尋推兵部侍郎雙親年邁疏請終養奉旨勉留會江彬導武皇駐蹕延

陽曲縣志

卷十二

人物列傳

十九

綏橫甚璘執大體彬不敢肆有逆獄旣成賄彬欲活之璘不聽時稱爲真都御史又引疾乞休不許未幾雙親訃先後至哀毀幾滅性疏歸進階通奉大夫

朱璜宏治乙卯舉人知高陵縣剛方有爲鋤暴安良刁猾遠遁仕至平涼苑馬丞

薄彥徽宏治丙辰進士官南京御史屢上讜言權貴憚忌逆瑾專擅劉健謝遷兩元老同日挂冠徽率科道上疏乞留瑾大怒逮繫詔獄主事王守仁疏救之并杖斥

張天相宏治己未進士知慶陽府陞陝西右布政度量宏

深政務寬簡民親愛之

解英弘治辛酉舉人知會寧縣有守有爲期月政舉尋以疾歸

申偉正德庚午舉人任韓城教諭正直明快勤於勸課陞偃師知縣

王範正德庚午舉人授歸德知州流賊數萬攻劫衆欲棄城走範設法調護卒保無虞有大姓挺人至死行金脫罪不受竟坐以法補陝州始終一節年高德邵郡鄉請爲鄉飲大賓總督翁萬達禮聘籌邊且奏記委用辭疾歸年八

陽曲縣志

卷十二

人物列傳

二十

十五卒

張文明字應奎正德辛未進士授行人拜御史按遼東斥奸豪植良善再按陝西發中官廖鑾貪事捕其黨二十四人實於法帝幸西邊上疏切諫乞斬江彬有諸司如紙糊泥塑之語時人傳誦之未幾謫電白典史世宗卽位復原職補山東道御史以內閣政本將疏請辨忠佞以端治亂之原張仲賢洩其語爲時宰所嫉出爲松江知府都御史李鐸上疏乞留章下吏部不省文明萬里覲君未及一言抑鬱疽發背至任而卒贈太常寺少卿

侯綸正德辛未進士任戶部主事禮部郎中擢湖廣副使  
伸雪冤獄督大工費出有經值歲荒上飢民圖獲賑以蘇  
官至戶部侍郎子汝諒舉進士歷官都御史亦以廉能稱  
張四維正德丙子舉人知荏平縣邑當衝疲民逃亡過半  
四維招撫流移均隣邑館陶地糧著均田圖宿弊盡祛陞  
彰德府同知裁抑強宗革除冗費百姓立碑德之

彭希曾正德乙卯解元精毛詩授河南開封通判歷署長  
葛鄆陵在長葛重修學宮執經問難者函席恒滿在鄆陵  
削平土寇擒斬數千百級文經武畧震耀一時考最進階

陽曲縣志

卷十二

人物列傳

二十一

奉政大夫開封府同知

李春芳字元實正德辛巳進士授盩厔知縣資性明爽值  
歲饑勸富貸貧全活甚衆尤善營度計長久欽取兵科給  
事中遷順德府知府

楊果布吏員敏慧有心計以才見任選西寧衛經歷軍興  
調發呼吸響應按使薦其能擢判晉州遷東平州同知有  
政績薦知費縣甫下車卽釋逋負擊者二百餘人免七千  
租復業者日衆立社倉開荒地復流民栽桑棗給官牛立  
官莊善政不一以卓異聞陞濟南府通判

楊永清正德間知隴西縣廉靜愛民有守有爲振興學校  
修葺城池盜賊屏息士民感戴

范盈正德間知安定縣持身不苟視民如子省斂備稅出  
俸鑄學宮銅祭器士民悅服

智鑰嘉靖乙酉舉人沉潛簡默與物無競爲諸生時博學  
多識與兄鑑伯仲蜚英後遊成均友天下士學益該博淹  
貫爲文不事雕琢而持論奇特遐邇嚮慕識者以大智不  
科小智不甲爲憾官至宜陽知縣

孫允中字伯時嘉靖丁未進士授襄陽府推官考最拜給

陽曲縣志

卷十二

人物列傳

二十二

事中時太監杜泰提督光祿寺乾沒內帑以巨萬計少卿  
馬從謙奏發其奸泰亦訐從謙盜用大官食物及誹謗不  
忠狀允中上章劾泰如從謙言上命逮從謙泰於鎮撫司  
并逮允中上怒從謙誹謗下法司令與泰追贓擬罪終以  
允中奏免謫宜川典史公論偉之

韓寧字汝靜嘉靖辛卯舉人性孝友遭際不偶家人恒以  
恒情所不堪者苦之卒無難色生平喜古文辭經史外無  
所不窺詩文振筆立就初知定興縣擢通州知州尋改廣  
安所至皆有惠政

唐頤字子觀希介孫嘉靖乙未進士官至臨洮府知府持已清謹歷二千石而家業蕭然退歸後不干謁不談時政得失循循退讓優游林泉四十年學者稱爲東巖先生王道行字明甫嘉靖庚戌進士時歐陽文莊公典試稱得人明甫年最少初授鄧州知州遷大名同知轉蘇州太守正直廉介所至吏畏民懷人不敢干以私歷擢應天副使陝西參政河南按察使四川布政司以耿介忤當路歸杜門著書或與里中耆德結社觴咏陳民間利病如議開三門復書院革說帖之誣雪青衿之冤罷一切諸行庫役斗

陽曲縣志

卷十二

人物列傳

二十三

級里長之苦當道重之所著有桂子園集行於世

李應時字子徵嘉靖壬子舉人累上春官不第謁選部堂閱應時藝奇之欲少留以圖甲第應時固請乃得授兵部司務故事寅僚於職方武選得請叅遊而下二人取其謝以資旅費應時獨不屑終其任無所請同僚重之俸滿轉南京戶部員外郎甫八月致仕囊橐垂竭不能治行李賴故人爲郡守飲助以歸家居破屋頽垣不蔽風雨薄田僅供饘粥宴如也非公事旅謁不見當道不私投一刺蓋其方介自性生云以孫成名貴贈通議大夫戶部右侍郎



李希洛字宗程嘉靖癸丑進士知昌黎縣以教化爲先士民翕然歸之時關中地震民多死傷以希洛善撫綏移知渭南縣至則掩骼埋胔招恤流亡邑人建祠祀之行取第一拜戶科給事中首彈總督胡宗憲貪肆與相嵩忤尋以母憂歸里事兄通判公希濂愛敬純篤里人婚喪不能舉者傾貲周貸歲饑煮粥食人全活甚衆所著有益言錄政學訓言錄明儒要言性理守約集夢心記

萬自約萬歷庚辰進士授唐縣知縣招流移墾荒蕪單騎省耕黠悍之俗變爲醇謹擢刑科給事中劾罷大司農改

陽曲縣志

卷十二

人物列傳

二十四

戶科復劾罷兩都御史一尚書及翰林學士當事忌之外補陝西僉事課士作人持重得體歷南北卿遷順天府尹揮庫藏羨餘裁不時之索忤權貴歸里澹泊自甘惟事詩文卒年五十士論惜之孫鼐順治乙未進士

李光輝萬歷丙戌進士由御史巡按直隸恬靜慈惠睦族

篤交爲鄉里稱仰

前明邑乘公手纂修

李成名字心白應時孫萬歷甲辰進士授中書己酉典試雲南擢吏科給事中建白不避權勢劾方從哲子不法事遷山東副使比入覲從哲謁謝謂其子得彈章自新尋擢

太僕寺卿陞僉都御史巡撫南贛嚴黜墨吏僚屬肅然居贛八月教化大行爲魏忠賢所忌以縣官給由爲觸御諱遂削籍崇禎初起戶部右侍郎尋轉兵部左侍郎告歸二年卒著有半畝園日涉園詩集

馬瑞富而好施嘉靖間北兵內侵捐金給守城夫役常助修書院及城隍廟費千緡直指旌其門曰義耆之家孫諫登進士

馬諫字忠銘萬歷甲辰進士授南宮知縣有惠政遷屯田郎值國喪三大禮皆經畫盡善擢湖廣參政遷按察使移

陽曲縣志

卷十二

人物列傳

二十五

檄禁贖緩辭意愷惻陞雲南右布政遽告歸居家濟貧賑荒扶危急難屢陳當道爲鄉人除力役行戶諸苦所刻有陰隲錄感應篇明刑錄勸懲圖說等書

楊于國萬歷丙午舉人授館陶知縣有惠政擢順天府治中歷陞關內道敏練清慎出納軍餉纖塵不染吏胥將領不敢侵漁內豎高起潛督兵至關于國抗禮高脚之誣奏陷遂告歸未幾以邊功優叙樞輔楊公疏薦起用堅卧不出日惟課子讀書與一二知交朝夕吟和不預外事

姚一麟萬歷乙卯舉人授中部知縣崇禎初兵連禍結

饑頻仍賊踞城內兵圍城外廬舍灰燼民僅子遺一麟極  
意軫恤撫殘黎復縣治漸有甦機且嚴明果斷吏無訛法  
民獲寧宇洊陞漢中知府

王元雅萬歷庚辰進士歷官都御史巡撫遵化崇禎間城  
陷冠帶縊死於公署全家以殉順治三年巡撫方大任言  
元雅有失城罪而一死節概凜然足以蓋愆樞輔孫承宗  
請恤殉難諸臣亦首元雅而以大吏故贈恤不及

張鳳奇萬歷丙午舉人官長治教諭才幹精明陞國子監  
博士崇禎初任永平知府城破鳳奇冠帶仰藥死妻妹妹弟

陽曲縣志

卷十二

人物列傳

二十六

婦一時自縊者十餘人贈太僕寺少卿廕弟鳳梧入國子  
監讀書官廣平知府

陳經太原左衛指揮少有大節善騎射事繼母孝正德間  
任寧武守備北人犯關經出戰死上官交章奏敕賜昭勇  
將軍立祠祀之

畢文太原衛指揮授遊擊將軍以事下獄嘉靖間巡撫葛  
縉議減標兵糧衆軍鼓譟剽掠城市焚劫公府欲推文爲  
長撞園門入露刃羅拜曰某等計出無聊願戴將軍文怒  
嚙齒罵不從且諭以大義賊以刃逼脅文益罵不休遂遇

害少司馬兩溪萬公撫晉知其事檄下有司建忠義祠於北門外後敕建忠節坊

陳嘉琦太原衛千戶甲申闖逆攻城嘉琦派管火器賊攻東南角甚急嘉琦親冒矢石率卒守城兵士有以火罐擊賊者罐迸裂延燒樓內火藥嘉琦死於火弟嘉貴亦死焉孟養浩字巖公崇禎癸酉舉人性喜鼓後進結社課藝售者一十四人謁選授澤州學正學使者袁臨侯下車訪之揖曰嘗奉教於先生矣如某藝某藝實予之指南也擢知寧陵縣時流寇猖獗所至屠戮寇退養浩必設祭祭之且

陽曲縣志

卷十二

人物列傳

二十七

哭之慟練義兵賊不敢犯邑有苗宦豪橫浩每抑之知苗啣已欲中傷密令人伺黃河渡果得苗使所挾書幣誣陷狀出示暴其惡民訴苗者詞盈篋因叩閭有旨籍苗所占田產還民以積勞嘔血卒民以檀棺殮之哀震林谷立祠祀焉

尙時彥字美中崇禎丙子舉人幼孤事祖母及母孝處內外兄弟無間言師姚太僕姚臨終以二幼子並後事托時彥力疾經營授二子經且爲延師得成立從叔尙忠無子引同爨事之如所生忠晚生子病亟懼姪時行虐幼子許

時彥以百金托孤焉後時行果虐幼子時彥以所遺金遍散時行等解之孤得安生平於書無所不窺善爲古文辭歷十一科三舉副榜至晚方售癸未上公車卒於京邸所著有草窗集二十卷

朱廷鄣代藩宗室崇禎中爲鞏昌府通判署秦州事有廉直聲十六年冬賊陷城賊帥使跪朱叱曰我宗姓頭可斷膝不可屈賊欲活之大呼曰今日惟求一死乃見害

張鳳翥字青毛原籍太原入陽曲庠爲名生員適江南趙公鳴陽館潘侍御家鳳翥亦從學焉後趙公南旋爲仇所

陽曲縣志

卷十二

人物列傳

二十八

陷言逆璫魏忠賢票擬俱出鳴陽手逮至京下獄鳳翥聞之卽赴都叩閭言某年至晉課徒某年旋里安能分身禁地趙公得白出獄遂偕鳳翥渡江遊蘇杭諸勝境將返竟以所著舉業及行文法律授之崇禎庚午果鄉捷第二是科趙公子玉成亦中式都中相晤握手道故言趙公見山西試錄拍按喜曰吾今有以報張生矣後爲瑞州推官補

安陽知縣

據原李耳載補入

王嘉言字獻明傅山傳曰先生昆仲八人先生長諸弟稱之爲老大貌樸厚而高眉秀目鬚冉冉得風如古道士遊

宦二十餘年貧不任辦美衣精食然亦性不屑此時有宦途人所餽書儀諸弟遇之輒弃去遙語老大寫書報之老大笑而頷之山生平不登宦人之堂敬先生風以事拜先生先生所居在橋頭庭堂牕戶不能得紙風鳴鳴然索客坐椅子不得成對好圍棋終日夜不倦亦不用心信手談耳陳生謚言曰過先生棋索卓子卓子殘毀不穩喚小厮不來自起繞地尋支高木瓦支之定對弈食時中出小米飯二碗黃鹹菜二碟對謚云客待食則食些我蓋不敢讓謚頗怪之及看先生食甚香美不介意以是信先生之貧

陽曲縣志

卷十二

人物列傳

二十九

之真守西安嫌郡煩劇苦求調簡得寶慶喜曰是中出丹

砂未任察罷

按嘉言後爲闖賊所掠暴骨秦中

錢文蔚字虛舟與王嘉言丁酉同舉於鄉傅山傳曰先生以廣文復令百泉二年餘歸歸之日卽焚官帶製棺木斂衣備而藏之曰吾事了矣從今無一事可縈吾懷圍棋茶酒吟風弄月尋花訪竹入夏則三月不見客讀書抄書時時有詩不屑屑摳心所得佳句率粗健淡率極似老杜口占諸奇句七十以後益老益健益率益淡八十精明而沒所抄書及詩集多散失先生潔癖以縣令居家而地方有

司多不知有先生山數數造先生語山前輩人行事山聆  
之忘儻然也語聲極高竟日夜不低不能飲而飲興豪舉  
噉笑勝後生憶戊寅正月先生治具邀山輩集崇善寺坐  
過半夜矣先生神益旺次日有詩示山輩曰誰謂錢生老  
猶然一酒狂晚年自號虛舟老人以上二人據霜紅龕集補入  
王英左衛人少孤育於祖母性至孝祖母病刲股以進病  
尋愈成化乙酉舉於鄉授知滕縣有惠政滕民思之立去  
思碑

程宗齊童孺時卽知孝事父母一飲食必先進父母疾瘳

陽曲縣志

卷十二

人物列傳

三十

藥親嘗焚香籲天請以身代及卒擗踊攀號食不下咽愛  
弟宗讓誓不析居弟子喪母撫之若己出置義塚葬無歸  
骸骨以園畦三百贍養族人子書亦有孝行鄉評重之舉  
於官旌表其門

周紳父早亡鞠於母姜氏貧不能養圖刀圭以奉甘旨母  
亡旦暮悲號棺殮窀穸悉如禮制結廬墓側歲荒多盜夜  
過廬戒勿驚擾瑞穀不種自生鄉里重之

程巖父早亡事母盡孝歷五十年若一日母歿喪費皆自  
備母所遺服飾併賻儀散兄若弟有姊氏貧時給米薪死

則葬焉鄉閭有爭者多勸諭以息之俗爲之醇

段廷用藩司掾父早喪事母孝及歿於墓側起茅屋時值饑荒盜不忍驚害種瓜麥以備烝嘗麥多雙歧瓜有並蒂蓋孝感云

朱慎鍛靖安王長子雅好詩書敦崇孝道母妃盧氏疾危醫藥罔效割股煎湯以進母服之頓愈

壘凌雲萬歷間歲貢授隰州訓導偉幹宏聲事嫠母至垂白若童孺時治周易旁及他經性理通鑑諸子百家靡不涉獵本朝掌故尤稱習熟晚同王右丞婆娑桂子園中潛

陽曲縣志

卷十二

人物列傳

三十一

心名理有叩之者應答如響

陳舉父先逝事母至孝母年九旬舉孝愈篤及母卒喪葬竭力廬於墓側歷三載經盜六次堅志不渝年踰古稀孺慕終身

馬謨沉厚簡默父早逝事嫠母專置一室悅篋牀几無不鮮麗時備肥腍蔬果供食或自斑舞或令諸婢歌呼以悅其心至深夜不忍歸母就寢戒童僕無譁母登大臺喜不勝懼祝天願以已算益之日取觚角躬自浣滌其他施錢米皮裘以濟無告覓貧媪以哺棄道嬰兒皆爲母祈延年



母卒朝夕哭泣寢食俱廢喪葬畢尋以哀思亡

陳天壽事嫠母至孝生順志歿盡哀遇父黨長者曲爲恭敬宗人中有貧死者具棺衾殯之庶宗某父病出米十斛延醫全之他若孫相劉憲疾則養死則葬又如張珠夫婦邁疫人皆畏避二子方脫襁褓天壽攜二子曰送米食卒  
賴全活

馮瓊字德華貢士授定興訓導陞延津王府教授不就以孝友稱讀書操行孤高卓絕熟子史食不二味衣不文采見人有污若將浼焉妻霍氏卒誓不再娶卒年七十九

陽曲縣志

卷十二

人物列傳

三十二

趙定父遺廬價可二百金與兄宥同居兄邁急難讓兄鬻之兄難甫脫而定囊已洗矣歲舉常平法資什一之羨以自給一夕盜入其家定覺善言勸諭恐爲邏者所得天曙始令去後子尙忠登賢書寵命褒贈

陳邦鎮郡庠生博學通方脉性善飲家無擔石之儲教授生徒以自給中年鼓盆不再娶好樓居卽祁寒盛暑與子共寢學使者聞其賢給冠帶表其門目尙義年七十不疾而終

陳嘉會郡庠生治周易未冠試輒冠軍十上秋 於一

第其生徒藉以取青紫者甚衆好施與多隱德以壽考終  
姚文碧爲吏事總捕府爲人質誠端慤愷事公庭直枉必  
察承歡子舍孝友並稱壯歲喪妻有子尙幼傷孝已伯奇  
之苦絃不再續其陰德最大者總捕府有盜案株連無辜  
多人文碧白於官官疑之力辭請去曰古人寧失出毋失  
入况明知其冤乎官驚服皆爲開釋後子鏞登辛丑進士  
官御史

李讓幼失怙喜讀書繕橋治道建臺築堡扶弱濟貧初怡  
情絲竹及舉子能言罷一切嗜好日以聲律訓子曰至樂

陽曲縣志

卷十二

人物列傳

三十三

無如讀書至要無如教子子希賜以明經恩選兩任巨邑  
縣丞有治聲後子孫數十人俱文武才年八十六卒

王堯欽萬歷間汾水爲患議建橋梁捐銀一千兩兩臺表  
給冠帶

樊子英晉府典仗官賊入府執子英子英帶酒見賊不跪  
睨地下一大磚猛力提擊中賊帥幾死羣賊擁見逆闖曰  
見萬歲去子英曰誰怕他就見那賊頭奴才至闖前慢罵  
如故賊勒殺之

朱長安雲邱府宗子闖圍太原長安令母妻妾妹及弟婦

十餘人羅列并傍城陷曰母投井促諸婦女繼之長安亦  
殉焉井塞不及水未死賊出而勒貲不得榜掠死  
朱霞以宗子補郡弟子員逆闖陷城霞至圓通觀前投井  
粘帖於井椿曰府學生員朱霞死此井其父朱慎鉦於其  
年八月賊殺宗室憐其老欲釋之慎鉦大呼曰柰何不殺  
我延頸就刃而死  
朱小二寧化府宗室子闖寇太原與其妻及一妓張飲已  
聞城陷逼其妓縊妓少難小二卽拉殺之隨與妻並投縊  
而死

陽曲縣志

卷十二

人物列傳

三十四

朱敏叅字麓松晉藩宗室授龍門通判聞闖陷太原意家  
屬必遇害乃設父靈成服而祭既又設香案望闕拜謝粘  
小詞壁間有君恩難負五倫須顧語遂投縊死  
朱慎鏤晉府宗室攝雲邱郡王府事賊陷太原冠帶祀家  
廟驅家人入廟中焚之亦投火死  
彭鯤初爲弟子員以父叅戎振雲陣亡任百戶闖陷城鯤  
入家拔刀待賊至格殺數人力竭被害  
魏選奇邑庠生闖逆陷城賊持選奇急抵家見妻爲賊所  
迫奮拔賊刀殺妻隨被害

孫禎貢士授蒲州學正城陷投井死

張景維天啟甲子舉人授河南光山知縣未任被執不屈死

田大治邑庠生闖賊犯太原大治乘城協守賊登城衆皆潰散大治拔刀獨留賊曰汝何人答曰吾諸生也專斫汝頭賊殺之

韓從周字尚文讀書操行隱德不仕以明經修行舉力辭弗獲遂應薦往行至半途以疾作遽歸隱居讀書終身不出

陽曲縣志

卷十二

人物列傳

三十五

朱文衡雲邱府王孫城陷被執曰我宗室也賊桁夾之勒出餉厲聲罵賊不絕死

瞿通晉府儀衛司人城陷先令家人自縊遂自焚死

王德新晉府羣牧所千戶闖賊破城晉王被繫德新見之憤甚投晉邸菊花園井死母李氏年八十亦死

司鼎前衛千戶守北城城陷語家人曰我當死汛地遂登城死之

劉秉鉞前衛指揮城破被執罵不絕口與右指揮馬負圖同時被殺

江明北城鄉約率夫守堞賊登城而衆皆潰明獨不去被殺

申鼎欽原任大同守備賊入城奮佩刀馳騎殺賊二人羣賊擁至擊殺之

韓似雍衛指揮守東城城陷力禦死之

陳功賊至被執不屈死

任萬民崇禎間諸生常著救時八議守城十說獻之撫按薦授城武令任三載城破死之

高白修孫光勳隆慶中輸財助官賑濟旌義民

陽曲縣志

卷十二

人物列傳

三十六

樊維藩諸生闖圍太原率丁夫守城捍禦甚力城陷被殺楊方生性慷慨尙節義闖寇之變二弟被執時方生居鄉急 詣賊曰我楊氏冢子有事當任於二弟無與賊釋其弟囚之兩月幾死後得脫

朱表杪字竹溪晉藩榮靖王曾孫醇謹好讀書爲文根柢秦漢詩賦皆有名書宗二王法草尤勝子知鰲束髮習聲律年甫壯學成嘗遊玉柱峯藐姑射山所至多佳句士大夫稱之

裴景鵬邑舊族沉靜厚重月旦有長者稱以掾吏授河州

衛經歷遷保定府經歷司關紫荆局頗羶處之淡然惟通商賈勤吏事秩滿註上考觀風使以清慎聞於朝旦夕將膺民社鵬喟然曰知止不殆遂決意請歸去之日稅餘數百鎰守者曰此公應有言至再鵬終不受蕭然歸田茅屋數椽曰課子孫讀詩書行善事每取古人孝弟事訓勉鄉人無倦色以子鉉貴累膺敕誥孫潤

裴潤字念源萬歷間諸生未成童父歿哀毀骨立刻志下帷舞勺補弟子員食餼伯兄澤見背遺藐孤三煢煢無依祖母汪氏猶在堂叔鉉尙幼一餼所入不敷數口資乃授

陽曲縣志

卷十二

人物列傳

三十七

徒以館穀佐生計口授叔三禮句櫛字比常丙夜不寐鉉弱冠成進士潤嚴毅方正寡交遊惟與關內道楊定一學博楊繼川相過從文史外不涉他務所居藜牀一席屢穿不易數困場屋益奮勵刻苦年五十歿後以子希度貴贈奉政大夫通政司右叅議祀鄉賢

裴希度字晉卿崇禎甲戌進士授堂邑知縣甫蒞任卽揭父母二大字於座右時值奇荒兼有賊變希度實心撫字多方調度煮粥賑饑全活者甚多築城濬池不惑堪與家言雖攫疾弗悔也治堂如給貧民牛種以勸耕停簽報解

糧以蘇困革戶馬喂養之累除遼餉賠累之苦皆其善政也公暇則讀法課士風俗人文翕然丕變遷工部主事尋擢監察御史巡視南城時流寇逼畿輔議者欲逐秦晉豫三省之在都者公但飭行保甲欲以鎮靜弭禍亂而大勢已去事不可爲矣賊陷太原母范太夫人殉難於城之東北隅別墅井中希度慟念母節捨別墅爲報恩寺服除巡視漕運凡奸胥乾沒滑弁侵欺積弊爲之盡剔再督兩淮鹽課剔弊一如巡漕時尋爲忌者所中謫陝西按察司經歷內陞大理寺右丞轉左寺丞擢通政司叅議致仕歸閉

陽曲縣志

卷十二

人物列傳

三十八

戶課子讀書年六十三卒堂邑百姓聞喪遠來哭奠者百數十人所著有澹明野嘯息齋藏書等集裔孫藍仙爲邑諸生齒德兼優乾隆乙巳嘉慶丙辰兩預千叟宴藍子謙官翰林洊陞侍講學士豫歲貢司訓懷仁隨以拔貢官貴州知縣

傅徵君山字青圭一字公他祖霖山東遼海參議父之謨明經授徒稱離垢先生山其仲子也生而穎異讀書十行並下善詩古文詞尤工書畫年十四補博士弟子員十六餽於庠督學袁公深器之命讀書三立書院時時以道學

相期許後袁被誣下獄山徒步千里伏闕訟寃由是海內無不知傅山其人者迨袁誣既白出督九江屢遣使召山山不往李自成亂山遂棄弟子籍遨遊平定祁汾間或坐深山閱釋典戶外事弗問也康熙戊午舉博學宏詞科屢辭勿獲抵都門復以老病辭授內閣中書銜放歸越六年卒山居母喪卧苦枕函食粥不茹蔬者百日先人遺產爲其弟蕩費殆盡無怨色及弟歿遺孤尙幼山撫之不啻己出其天性如此及卒四方會葬者數百人所著有性史十三經字區周易音釋周禮音辨條春秋人名韻地名韻兩

陽曲縣志

卷十二

人物列傳

三十九

漢人名韻若干卷子眉

傅眉字壽髦公佗山之子也別號小孽禪五歲失母祖母貞髦君撫養之七歲能小詩賦十五通經史能文章十七遭亂東西馳逐十年無家甲午父以蜚語縲太原獄中眉羈陽曲倉一夕夢鐵藕開花一枝事尋解辛卯僑西河客有知其才者令續鸚鵡賦眉援筆立草四百餘言奇氣橫溢文未竟客曰止止擲筆而罷亦不收拾終篇也眉父行戴楓仲稱其學類縱橫家自擬措注作用時命不偶遂轉地道賣生藥與父歷遊燕趙齊楚秦豫間手挽小車載行



李以爲常嘗估於維揚有估客樂四言樂府一日公佗論及某饑寒眉曰此輩並非饑寒累了我正是我累了饑寒公佗曰此語大可讀書法眞行草直追魏晉漢隸尤所獨步公佗自謂不及也兼工繪事精璽法讀釋典如舊識史自宋以下不讀也著有我詩集不摹古不襲時膽識超乎衆慮體法創所未有故曰我詩先是楓仲嘗梓公佗白居易實胡季子暨壽髦作題曰晉四人詩四人者心同學同膽識同時命同各有序例稍見品絃妻朱平定諸生女先眉歿眉誌其墓云此糟糠結髮朱子之隴也今之誌婦人之

陽曲縣志

卷十二

人物列傳

四十

隴者焉有不稱其賢吾恥之誌之以情年五十六先公佗卒公佗哭之哀子蓮蘇赤驥皆以才名

按戴志人物狐突父子交城人公孫杵曰程嬰太平人今皆削之餘以太原晉陽并州志者七十六人考府志與太原縣志內止載六十六人其十人亦不可湮沒弗傳附錄於後

王象三國并州人建安中爲魏太子所禮魏拜散騎侍郎封列侯性器樸厚文采溫雅稱爲儒宗

王沉西晉晉陽人沉少孤養於從叔昶事昶及祖母寡

嫂以孝義稱好書善屬文以佐命勲遷尚書令散騎常侍封博陵郡公

王恭晉人字季伯少有美譽清操過人與王忱齊名友善嘗從父蘊入都忱訪之見恭所坐六尺簟因求之忱去恭卽以簟送之自坐薦上忱聞之驚曰意卿簟多故求耳恭曰恭生平無長物其簡率如此後贈侍中太保諡忠簡

張偉後魏太原人通六經受業者常數百人門人事之如父魏太武時與高允等俱被辟授中書博士進爵建

陽曲縣志

卷十二

人物列傳

四十一

安公諡曰康

郭雋隋太原人家門雍睦七葉共居犬豕同乳烏鵲同巢時人以爲義感之應州縣上其事高祖遣昌平公宇文弼詣其家勞問之

後漢太原人勇敢善戰仕漢擢安國軍節度使

封杞國公

張從恩宋太原人周封褒國公宋初改封許國公

安守忠宋晉陽人開寶初濮州刺史會河決澶淵命守忠副團練使曹翰護役河決遂塞拜濮州團練使

王守忠宋晉陽人知興元太守累遷威德軍觀察留後  
爲治簡靜喜與士大夫遊

李洪信宋晉陽人乾祐中以羣小用事求解職周加同  
平章事宋初擢左驍衛上將軍

國朝崔嗣達字季通順治乙酉拔貢安貧不仕學問淹博爲古  
文理宗程朱闖變兄嗣遠與嫂殉難撫姪秉鉞同龔二十  
餘載教育兼至獲登賢書尤善誘後學終其身手不釋卷  
郭文雄以恩貢知崑山縣邑稱富饒文雄一介不取卒於  
官無以爲殮士民重其廉葬於崑立廟祀之

陽曲縣志

卷十二

人物列傳

四十二

趙標以恩貢知德安縣律已嚴介待人溫和喜讀書善古  
文辭卒於官無力歸葬士民助之

王廷衡武解元任都司營中軍姜賊據晉祠廷衡繕火具  
攻之不克自焚死祀忠烈祠

潘一桂鬻飯奉親飲食必敬父行不飭有所需竭蹶以應  
抵暮不歸執燭以待醉則扶歸終其身如一日父歿廬墓  
人皆稱爲潘孝子學道與各上臺給匾旌表

李家選前明丙子舉人懷慶府推官

國初授懷慶府知府單騎入太行招土寇范以忠鄭國安等

胥令復業又請豁逋賦二十餘萬民德之擢湖南道卒  
賈士楚八歲喪母依父膝下承顏順志有逾成人父繼娶  
李氏未數年父歿而祖母馮在堂不敢以失怙之慟傷重  
堂心也事祖母曲盡歡心事繼母無異所生及重堂棄養  
之日馮年八十有六李年八十有一士楚孺慕之誠鄉里  
欽重之乾隆四年

旌表

李華齡字嶽生廩生事親孝父珪病延醫用珍餌父止之  
華齡典衣物購參苓暗置藥中服之寢愈

陽曲縣志

卷十二

人物列傳

四十二

馬田徵光祿寺署丞因守城捐米二百石銀三百兩以佐  
軍

高士達貢生己丑姜瓖叛奉劄委署平遙縣事蒞任七日  
城陷被執賊勒授僞職不屈乃遇害

趙瑾字懿侯順治丁亥進士官長洲知縣工詩嘗刊山右  
詩自薛文清公迄順治庚子名晉風選後洪洞范彪西三  
晉詩選鳳臺李牧坪山右詩存皆祖之

侯璋字樸庵康熙丁未進士官內閣中書少穎異有經濟  
學熟肄禮樂兵農錢穀鹽鐵諸務及改試策論指陳利害

殊悉戊午典湖廣鄉試手諸生卷殫神簡閱夜漏數十下  
不少倦榜發日卒

張志遠字鵬期品行端潔康熙間諸生博學工制藝善詩  
詞旁通醫學楷書得黃庭遺法督學高龍光稱其整飭勁  
雅可配文待詔晚年學益勤聚羣書手自評隲著詩詞稿  
三卷詩叶正韻一卷切音要訣一卷醫學抄要八卷

王志曾字欣沂雍正乙卯拔貢官山東莘縣知縣調諸城  
撫巡士庶不恤勞勩歲飢力請於上截漕數萬金全活甚  
衆以徵解未完落職明中丞以其罷職爲歉嗣巡撫山西

陽曲縣志

卷十二

人物列傳

四十四

陽曲令初見卽問之答以不知中丞怪之令曰惟不知所  
以賢耳申丞頷之賜二東召父匾旌其門子雯成進士澤  
州教授

王彬字中軒諸生性嚴正有古君子風事繼母至孝數十  
年如一日父志曾自山東解組歸饗殮莫繼彬與諸弟以  
舌耕奉養諸弟姪多受業其門規矩雖嚴而體恤無不周  
擊生平粗糲自甘一介不苟屢困場屋未嘗有愠色敦行  
績學至老不衰弟雯由進士補澤州府教授嘗抄薛文清  
公語錄以自省晚年以目疾歸恒獨坐默誦經文而繹其

旨曰此心不可使一時無着也子嗣昌庠生

張元林字德滋號茂軒雍正甲辰武舉第一由保舉授陝西神木令地近邊陲商賈出關者恒苦勒索爲請給路引至今賴之鄂爾多斯子女賣入內地有年久不願奉贖者哭聲震野甚至自戕乃捐廉倍償原主願留者聽後其王又奏請不許內地民牧種邊民非耕種夷田無以糊口尙書班赴陝勘議元林挺身見班力陳原委又上一勞永逸之策班從其說牧種如故乾隆二年兼署府谷值旱荒請帑賑濟未請之先預發神府二邑倉賑之有代危者元林

陽曲縣志

卷十二

人物列傳

四十五

曰距省二千餘里必待得請民無遺類矣葭州有監生吳某妻病死妻父誣與妾毒其女已擬抵矣大吏疑之檄元林覆審廉得其實釋之九年陞乾州丁內艱服闋補綏德州設官船渡行旅並請豁免河灘地糧州民有兄利弟產殺弟啟門誣控盜害者元林前夕夢有人以杵碎臼醒而異之比往驗疑其情狀忽觸前夢鞫之果獲血衣置諸法十八年擢知河南開封府每逢靈雨雖深夜必赴隄防禦四載無失嗣河決江南奉委協辦風雪沍寒不憚勞苦由是得疾告歸歷仕二十七年操守嚴峻初公之攝南汝光

道篆也會新疆用兵承辦軍需嚴飭屬吏毫不染指後事發惟元林及所屬吏無拖累者其清以遠害類如此年七十卒子成年由貢生選五寨縣訓導以善書聞

高尚禮字子敬雍正丙午舉人由保舉署江西南昌縣事邑故多訟胥役爲奸尚禮下車非命盜大獄不遣役捕給訟者官符一紙繪蒯狀紙尾名曰紙差令付証家轉給被訟人依限繳符剖決有違命者差蒯卒捕至痛懲之人樂其便令出惟行嚴保甲禁賭博奸宄斂迹四野寧謐邑鹽商向每季餽銀五百兩在任三載卒不受調署豐城嚴革

陽曲縣志

卷十二

人物列傳

四十六

火耗拆封日庫吏進短封名冊尚禮曰不可以錙銖擾民蠹役余某橫甚因事杖斃合邑稱快經年積案旬月判決人頌神明卸事曰民有清官離任赤子失哺之謠兩縣俱載入名宦誌其署貴溪玉山弋陽崇仁等處爲日無多而廉明公正悉著循聲乾隆辛酉以養親歸設館授徒娛農昏者幾二十年庚辰起復仍發江西署宜春縣有惠政民懸額曰民之父母題補瀘溪縣修城垣賑饑民興書院拔眞才內鮮幕賓案無留牘一邑之中恬如也尚禮前治大邑如烹小鮮視瀘直卧理耳未三載調彭澤時南城吳紘

主瀘講席素諗公行揖而言曰晉有陶柴桑唐有白香山  
狄梁公後先治彭遺愛未忘南郭外有三賢祠今得公而  
四矣因就見聞所及臚其大畧以示瀘人屬異日載諸邑  
乘彭濱大江七年之中三遭水患初次勸富民輸米並捐  
已廉賑之二三次患甚請帑賑恤民爲懸濟時舟楫匾額  
後以失察江心鹽船盜案降歸時年已七十矣生平待人  
直而不倨處事剛而不撓事上敬而不阿撫下寬而不縱  
蓋以儒術飭吏治者抵家後仍事硯食前後設教幾三十  
載學問淹博文筆高老多所成就如前進士張天植賈澄

陽曲縣志

卷十二

人物列傳

四十七

等皆其徒也年七十七歲卒子霖福建霍童司巡檢雯乾  
隆己亥科舉人孫廷元庠生思立歲貢生

王德讓字謙光號虛齊向陽鎮人雍正丙午舉人幼失怙  
恃家貧無資苦志潛修撫胞弟德應德良成立後德良少  
亡遺孤瓊幼復教養成人無異己出其出宰桐廬也勤政  
愛民有王青天之稱然勞於撫字拙於逢迎邑西北富春  
山巖子陵釣臺在焉其下出魚甚佳上憲索之不應未二  
載改降教職歸里補臨晉縣教諭振飭學規諄諄誘掖六  
載俸滿告歸仍以視食度日生平品行端方素位而行處



困益堅不涉卑靡汾府司馬陳正勲嘗以居仁由義稱之  
遇鄉里有急量力捐助有事則爲平其曲直人稱公道老  
人其設教於鄉也脩脯不計多寡列門牆者恒數十人年  
七十三歲卒曾孫肅庠生

李如蘭字長芳先世由榆次徙居陽曲遂隸焉十九補博  
士弟子員以貢授澤州訓導雍正初年例改主簿同輩三  
十六人獨如蘭奏對克稱徑授江南高郵州知州州當水  
驛孔道歲斂民間數千金爲僱募挽夫費所募夫率流勾  
水次騷擾如蘭禁革科斂擇便令宿單騎巡歷其弊遂絕

陽曲縣志

卷十二

人物列傳

四十八

州西甃社湖驟凍客舟多膠湖中用小舟二編竹聯底行  
冰上如轉輪遂得濟至今皆用其法在州九月積案悉清  
擢江南江寧府江寧人民稠雜豪猾爲奸號曰喇子縛首  
惡數人斃杖下餘黨始戢同城將軍所轄兵素驕悍請於  
將軍犯者必懲自嘆喏相戒不敢肆遷廬鳳兵備道懷遠  
壽州數百里湖港交通久爲盜藪往往藉捕漁爲業搶劫  
行旅乃駕大舸僞若過客伏健役舟中抵暮有數盜援纜  
而上縛其一役請急歸如蘭曰此去人家遠且示之怯泊  
舟不行秉燭危坐夜半見火光隱約林莽間又聞人語切

切窺舟寂若無人卒疑怪不敢動旦發有跪請者謂昨所縛爲良民并縛以歸廉得盜名及窟穴誅其渠魁數人而自某地至某地若干船皆有編號又增塘汛嚴保甲盜患乃息晉四川按察使初至罹重辟者數百人一一平反無留獄向發配人犯任自便以故殷阜之墟每羣聚滋事如蘭上言請以打箭爐松潘二廳茂會理二州等邊地處之又奏秋審人犯定以限期軍流加等不入於死竊賊問罪不計人數俱如所奏嘗判決獄近事比以爲問刑之準在川六年調江西按察使甫蒞事值歲稔流民數萬集會城

請截漕賑之晉四川布政司重農桑旌良善寔倉儲鉛銅就地開採省滇粵遠運勞費乾隆九年後水災饑饉踵至設法賑救民樂更生成都華陽兩縣附省舊責以領銀納米給兵餉百姓苦之言於督撫與外州縣均民困以甦會瞻對金川相繼用兵饋餉無乏尋以勞致疾卒於官年六十有四生平才德夙裕不自菲薄當其爲博士時嘗署陽城教諭會民怨其令甚聚數千人郊外謀揭竿爲亂聞變馳諭輒解散其於民生利病吏治得失講求有素故所至皆有政績可紀子天培進士廣西左江兵備道永祺舉人

福建按察使孫履謙廣西潯州府知府

李天培字因其號書傭四川方伯如蘭仲子也少端重寡言笑不苟取予潛心力學足不履戶外常以義命自勵乾隆戊午舉鄉薦會其父布政任內有分賠官項罰修東安城工家已籍沒胥吏猶追呼不已或至羈留別所喧沓環繞侵辱百端天培吟哦不輟屹不爲動久之得釋辛未成進士官工曹事無鉅細皆親自摒擋不假胥吏手洊陞郎中授湖南衡永郴桂道甫十月以官部時纂修則例事解任事白補廣西左江兵備道駐劄南寧與安南連界英猱

陽曲縣志

卷十二

人物列傳

五十

雜處抵任後卽有小鎮安民搶擄安南之事聞報馳往獲兇渠十數人檻上獄將具復偵得首犯乃故安南王莫登庸裔孫莫英流落雲南土富州爲人牧牛有江西貢生劉德輝授徒其地見英有先世遺印教以假恢復名私造印劄煽惑鄉愚天培具文言不獲英等其事未已當事者以爲張大邊事邀功將劾之會天培已擒英及德輝并所造印劄與同黨至乃寢戊子檄赴雲南辦軍差以條陳兵備事宜降歸初天培自幼以義命自安不以窮通得喪易其操其官京師也會保送御史當事者欲一至其家於畫稿

日示意不往其罷官歸也布政司某謂其清苦欲同官人贈五十金可得五千金爲捐復計辭之後主介休綿山書院適農撫軍起來撫晉與之有舊時方清釐河東鹺政有人以萬金賂求脫籍不應語所親曰貧自吾分豈以萬金易吾守耶與守土者歲時往還外未嘗一至其庭其誨人也先品行而後文藝嘗曰震幹而翹秀閑麗而辯捷吾不取也主講席八年卒壽七十有二子德申字令人弱冠遊庠屢躋場屋績學不怠舌耕養親乾隆甲寅始領鄉薦年已五十矣孫應均與德申同科舉於鄉以大挑官廣東知

陽曲縣志

卷十二

人物列傳

五十一

縣陞南雄直隸州知州曾孫甸道光辛卯舉人

李永祺字松期四川方伯如蘭第三子也乾隆甲子科舉人幼讀書講求致用之學不屑屑於章句詞章由大挑分發貴州補玉屏縣知縣陞黃平州知州所至事無鉅細躬自聽覽暇則講析律令親爲批註剖決毫釐稍有歧誤則與明法者討論再三久之研究精熟雖老吏皆謂不及上憲器其才保薦授四川順慶府知府調叙州府知府正已率屬嚴而不煩爲政務持大綱暇則與賓僚賦詩酬倡有松窗偶錄劄劄行世會兩金川用兵檄赴赤水站辦差

餽頓舍無缺無誤復奉檄赴雅州南路承辦糧精領官帑一百五十萬兩招商買米早夜籌畫在事五六年儲峙充羨旋丁內艱上憲以軍儲事重仍留辦理迨金川蕩平而商人未完帑銀尚有三十餘萬因督完二十餘萬其無可著追者廉其狀以告荷蒙豁免商民無不感戴服闋後補成都府知府便道旋里展墓盡哀抵蜀日大府倚重公事填委屢斷疑獄俱稱明允陞松茂道在任期年辦理狷匪差務咸中條欵旋授福建按察司閩省民風伉健訟獄滋繁獄上必反覆審核折衷至當兩署藩篆鈎稽簡校出納

陽曲縣志

卷十二

人物列傳

五十二

惟謹五十一年臺匪林爽文煽逆渡海總理軍裝糧餉隨大將軍福進剿遍歷南北兩路櫛風沐雨日無寧晷三年全臺平定仍留辦理報銷城工等事曉夜督治溽暑不休以勞飢染病卒於臺年六十八歲子以潤附貢生孫懷璋庠生

賈廷彥字吉士由優貢入成均補正白旗教習己卯領順天鄉薦教習期滿揀發四川知縣歷署江安納谿永寧榮經江油等縣所至約束胥吏平心聽斷不以武健嚴酷爲尚補清溪爲爐藏雲貴孔道民戶寥落差使絡繹廷彥於

辦公之餘留心撫字四載勤勞瘡痍頓起調繁華陽值金川用兵輓輸徵造必熟籌以便民審案委積嘗至夜分不敢憚勞後有核賠糧運欵項華民請於上代償之未幾陞忠州權成都府篆旋陞潼州府以外艱歸時母年亦近八旬患痰疾日夕侍側延醫調治背負出入暨母憂服闋補四川龍安府卽古陰平道也城東濱大江城堤爲江水所齧捐廉倡築樹柳堤上以圖鞏固修復先農各壇建書院購經籍捐膏火俾山僻向學東南鴿子崖石壁峭立下臨大江向沿木以渡行旅過者眩慄爲修偏橋三里如雲棧

陽曲縣志

卷十二

人物列傳

五十三

式往來便之屬邑江油中壩太平二場商賈輻輳爲江水漂沒過半閱視諭築逾年堤成兩塲復初人號爲賈公堤居龍安八載廉俸以軍需核減扣半幕不延賓案牘自理內無眷屬上下十餘人而已讌客止五簋擢延建邵道民聞如失父母瀕行扶老攜幼攀留不忍去旣抵閩委查各營汛炮位往來瘴暑中三月以疾告歸廷彥雖居專城一塵不染歸裝布被絺帷無異計偕時卒年七十三歲子澄進士官刑部主事孫志先貢生候選訓導

折遇蘭字佩湘號霽山大川都南溝村人少而穎異才敏

學博乾隆己卯庚辰聯捷成進士以知縣卽用初任甘肅正寧縣事修城池築石堤捐廉賑民撰修縣志嗣調會寧旋署靜寧州時兵差絡繹部署井然毫無貽誤各大憲均器重之題署河州盜賊盤踞慨然曰稂莠不除嘉禾之害懸賞捕緝如法懲治匪類一空以內艱歸服闋補湖南瀏陽縣捐建義學振興書院大憲素稔其才量調長沙委審積案旋丁父憂繼又丁祖母承重憂家居之日設館授徒成就多人起復後知廣東普寧縣缺簡事少彈琴坐理後調揭陽海疆繁劇不憚勤勞勵精圖治遂以疾卒年五十

陽曲縣志

卷十二

人物列傳

五十四

歲生平廉惠明敏所至俱著政聲詩文書法各自成家著有霽山文集看雲山房詩草選有古文集宜行世昔孫補山先生嘗以山右風流第一人稱之袁子才先生遊粵歸語人曰吾此行得山西一人詩有風格學有根柢乃風塵中麟鳳謂霽山也蓋知其文學者或未盡知其經濟而知其經濟者則無不欽其文學至其孝友性成物行克敦鄉里至今能言之子象樞職從九品孫六人長錦元嘉慶己卯舉人與公鄉榜同科道光丙戌大挑知縣試用湖北三慶元武生

申兆定字繩齋號鐵蟾乾隆庚辰舉人幼隨父宦遊流寓南服善詩歌工八分馳騁名場翛然以風流自命意氣如雲官湖南衡陽縣時與吳山趙魯菴江都李雨村及本邑折霽山諸人結冷香亭社郵筒往來倡酬極一時之盛中年忽慕神仙遂生魔障迷罔以終論者惜之

張思孝邑諸生學識淹博植操端謹家藏書籍甚富閉戶誦讀心與古會聲色貨利一無所嗜有顯宦以數百金售其寶賢堂帖原刻不肯蓋阿堵物非所計也雍正間荆溪儲畫山先生主晉陽講席思孝師之歸後十年思孝不遠

陽曲縣志

卷十二

人物列傳

五十五

數千里往正所學而先生病革矣手授存研樓集翼日遂瞑思孝親視飯含持心喪不去謀鐫其集躬爲訂定一時荆南人士若許重炎史崧徐洪鈞瞿源洙輩莫不高其行誼以孫百泉魏易堂諸君子相况謂不失讀書真種生民真氣其授經上邗也盡以其脩資鐫鄉先生傳徵君霜紅龕詩魏敏果公聖人家門圖說暨諸緒論以歸晚年造詣精純切仰止者造門請謁輒以經義指授子士樸庠生王志匡字一庵乾隆初年拔貢築室文瀛湖之西開館授徒暇則眺覽孝友嚴正爲一邑矜式工書法求者必應嘗



盛暑臨池衫襟整肅肢體莊嚴有惡少某袒衣而入立案側倪視志匡端飭自如久無懈容惡少亦徐徐整衣愧謝志匡以溫言慰之晚年授孝義司訓每擁臯比講經史竟日不倦勗諸生以立品制行不僅以帖括爲事姪新祚乾隆庚午解元官教諭

張天植字潯柏父愉舉人官浙江石門嘉興知縣天植身長七尺儀觀魁偉以進士高第授廣東永安知縣用廉能調繁番禺陞湖北宜昌府通判丁母憂未幾以公罪落職家居二十餘年杜門課子孫親知罕見其面晚年貧甚僦

鄰屋授徒其中自號六有居士取橫渠畫有爲宵有得六語也澹然自得口不言貧渭南蔣中丞兆奎爲進士同年自守太原日時過訪茗椀相對無杯酒之設洎中丞撫晉諗知其貧欲延致幕府則以不嫻章奏辭延主晉陽書院復以部民不當與大吏抗禮辭中丞三請不得已出主講席深自撝抑教人不專以文辭於威儀容止應對進退間示學者循蹈規矩之意比中丞去任遂辭歸卒年七十三天植少工楷法原本多寶樂毅腕懸鋒正不輕爲草書晚年出入趙承旨文待詔靜穆之中丰神秀逸有飄飄凌雲

之志然不爲人役故流傳絕少聞諸長老前輩居官率清  
貧身歿喪葬不能備禮故無誌狀政績多不傳然誌狀亦  
未可盡憑不知其服官觀其居鄉可矣先生官粵九年歸  
而家貧如洗殆蔚宗所謂身處脂膏不能自潤者歟子孫  
遵教困於諸生布衣疏食而踽踽獨行不與俗諧君子之  
貽謀遠哉子湄庠生

張天爵植季弟也字古修乾隆壬辰進士宰蜀之合江有  
廉聲以忤上憲委差西藏先有以規避術進者天爵曰絕  
域瘴癘犯輒隕身吾不往孰宜往者差旋擢同知以疾卒

陽曲縣志

卷十二

人物列傳

五十七

子澄己酉舉人沁州學正孫之棟嘉慶乙丑進士直隸寧

津縣知縣

閻廣居字子仁號安亭河口村人乾隆庚寅舉於鄉分發  
湖南知縣歷署常寧慈利耒陽芷江事所在以清釐積案  
杜絕苞苴振興文教爲常耒陽刁詐成風劣衿滋事廣居  
繩之以法馭之以誠兩次前後五載風俗頓易士民依戀  
共輸財代濟軍餉去後邑人猶時通音問乙卯三廳苗變  
調赴辰沅協辦軍務罔不經理盡善署芷江時貴州小竹  
山教匪滋事經晃州驛邏卒拏獲審訊無辜省釋甚衆嘉

慶二年補麻陽縣其地爲鎮篳門戶苗匪出沒無常民多  
逃竄乃建石碣築城堡招撫流民募丁壯爲鄉勇自是苗  
不敢逼民漸歸業大中丞姜公晟檄湖南北兩省牧令皆  
倣爲之而又編集條諭修理義學親爲訓課三年西晃山  
賊匪張方興作亂廣居單騎掩擒散其餘黨以功擢乾州  
直隸州同知士民立長生牌德之乾自兵燹後墟里瓦礫  
凡壇廟城郭甫下車力圖修復設義學實倉儲教民開煤  
洞種二麥相度地利於灣溪雙塘等處建石碣十四石堡  
十三守望相助無刁斗之驚初乾州失守宋公如椿死之

陽曲縣志

卷十二

人物列傳

五十八

以計俘厥渠魁祭於宋公祠又擒首逆石大貴磔之剿麻  
里灣苗匪親冒矢石斬獲無算叙績晉知府銜治乾四年  
以勞瘁卒於官年五十有七乾民哀哭罷市請於 朝祀  
名宦祠櫬歸祀鄉賢祠如例公性直諒敦行孝友博學能  
文手不釋卷平居聲色玩好一無所嗜與人交坦夷不設  
城府爲政不事苛刻嘗謂孔曰忠恕孟曰疆恕乃聖賢  
立心制行之本因以力恕顏其堂體行不倦著有有力恕堂  
全集格言錄梓行子士驤乾隆乙卯舉人太平縣訓導士  
龍嘉慶己卯舉人邑學宮久頽廢士龍慨然以募修爲己

任庚午辛未間約邑紳共爲經營督工十餘載始告竣而  
其心力亦幾瘁矣勒石甫畢遂以病逝年五十一孫佩蓀  
道光壬午舉人

賈六榮字肇封舊志孝子士楚之曾孫也昆仲三人六榮  
其季事繼母與二兄終身依依無間言少穎異十五以五  
經補博士弟子員旋食廩餼雍正己酉中副車除平陸教  
諭不肯赴優游山水惟日以文行啟後進所著有山木堂  
文集子景誼乾隆丁丑進士由知縣陞同知歸亦優游林  
下者二十餘年得見元孫五世一堂有四書文四卷

陽曲縣志

卷十二

人物列傳

五十九

蔣岐鳳字鳴瑞蔣家營人乾隆己卯舉人讀書寒暑不輟  
以文名於時家貧授徒事繼母以孝聞

曾璜乾隆間歲貢父歿家貧繼母殷矢以死殉璜長跪哀  
慰每食必親侍之母多病無冬夏侍立窗外有所需皆立  
具繼母有女適同邑張隨嘉隨嘉外出四十餘年無音信  
子女皆無養璜撫字聘嫁皆不失所迄今女得全節載入  
邑志性好學寒暑無間文藝真切教育人材成就者甚衆  
遠近服之

周玉隆父爲甘肅武弁遂家焉玉隆貌不魁梧而武勇絕

倫以行伍擢把總大將軍兆惠征伊犁玉隆從常以爭先陷陣屢立奇勲會官軍屯山上賊悉銳扼我師衆軍懼玉隆持槍直入中堅縱橫衝擊一槍恒貫三四人槍起尸墮復大呼殺賊所向披靡賊膽落官兵乘之賊大潰所擊殺凡千數百人日暮收兵玉隆爲殿有賊騎尾之玉隆聞馬蹄聲急迴顧槍已及腰側身避之賊忽墮脇下乃一手扼其項一手挈其胯橫置鞍上比還而賊肋已斷矣兆惠見之大喜呼爲巴圖魯軍中以比常山趙順平云陞守備尋晉都司卒玉隆所用槍二一長二丈重三十餘斤鋒六尺

陽曲縣志

卷十二

人物列傳

六十

許下作八稜稜脊皆有刃一長丈四尺重二十餘斤鋒長三尺餘制並同又一精鐵簡長三尺餘橫插腰間戰酣則擊以擊敵當之者無不糜爛故所著功獨多而撮其大畧如此長子某亦以驍勇聞年二十餘歿於陣

馬瑀字瑞符父雲翱由武進士歷甘肅提標遊擊出兵金川晉叅將卒於軍遂以武世其家焉兄瑄乾隆戊午科武舉弟全壬申武探花庚辰武狀元後以征金川陣亡瑀癸酉科武舉丁丑成進士由廣東饒平營守備註誤捐復留京營効力瑀兄弟俱能拉硬弓善騎射左右開弓發無不

中一時名噪京師而瑀尤妙於指授門人獲售者如榜眼郭元凱侍衛田永桐等俱知名士迨年滿補東河沿守備陞珠甫汛都司旋陞本汛遊擊轉左營叅將又轉中營副將陞任浙江定海鎮總兵時洋匪出沒無常瑀嚴斥堠謹巡察賊匪遠遁六十年調湖北襄陽鎮總兵戴花翎赴湖南防守苗匪事竣回鎮值教匪滋擾堵禦有方箭斃賊首七人殲滅餘黨幾盡嘉慶二年以軍功加提督銜六月抵川協剿方料理糧道帶兵堵截忽賊匪竄至王家坪等處文報不通瑀策勵將士於九月初三日攻夔州府放牛坪

陽曲縣志

卷十二

人物列傳

六十一

賊匪賊已敗退突有別股自箐林中出瑀奮勇截殺戰於張家崖山梁陡險身中數鎗墜崖而死與其弟全前後盡節年六十八歲事聞祭葬如例子國鈔世襲騎都尉次國鈺蔭生

馬全初名瓌字具堂誕之前一夕父雲翱爲甘肅孤山堡守備土人夢啟轅張彩如迎上臺狀尋見高軒入署次日卯刻全生豐額高顴大口長耳方瞳偉人也性穎異總角時塾師授以孝經至孝始於事親中於事君終於立身慨然曰人生大節三語盡之矣師大異之家世習武膂力過

人善騎射乾隆壬申聯捷進士 欽點探花及第授二等侍衛出爲福建撫標遊擊以與同官忤罷職乃走京師更名全投巡補軍大學士傅忠勇公恒奇之仍命就試復登庚辰進士大魁天下列頭等侍衛其遭際亦奇矣哉二十七年授江西南昌鎮總兵戴孔雀花翎振飭營伍嚴查奸匪三十年調江南崇明鎮總兵海島有羊山久爲奸宄出沒之所巡查嚴密奸宄潛遁嘗舟行海上大風折桅衆相顧失色全跪祝曰馬全如有負心明神殛之士卒何罪祝畢風息三十四年晉江南提督旋調甘肅提督三十八

陽曲縣志

卷十二

人物列傳

六十二

年請往金川効力加領隊大臣馳驛到控喀軍營殺賊二百餘級奪碉卡十餘處時大軍屯木果木全分攻昔嶺斬獲甚衆然深以元戎駐札非所爲憂一日賊騎猝至將軍福遇害全殿其後躍馬橫戈賊騎圍之數重矢石交集身被重傷力戰死事年四十二時六月十日也事聞祭葬如例諡莊節崇祀昭忠祠子國銳世襲騎都尉又一雲騎尉四十一年圖形紫光閣贊曰挾翼雖英御須造父設非其人良材徒苦陷木果木將軍僨轅殿後捐軀愧惜難言李璋字琳瑯乾隆丙辰武進士初任湖廣守備辦理金川

軍務著有勞績調宜章接壤粵東甲戌夏河水漲溢璋晝  
夜堵禦城賴以全陞湖北施南都司施南苦旱璋祈雨跪  
龍洞中兩膝著石處皆傷霖雨露足軍民歡頌陞湖南遊  
擊廣西叅將右江總兵會緬匪不靖辦滇省軍需有勞績  
加軍功授武顯大夫

李全雍正八年以行伍出征西番屢著勞績洊陞雲南永  
順總兵將軍明瑞保任提督乾隆三十三年正月隨征緬  
匪率衆猝至全奮勇當前身中烏鎗而死崇祀昭忠祠葬  
祭如禮子萬年世襲騎都尉又一雲騎尉補授四川遊擊

陽曲縣志

卷十二

人物列傳

六十三

征金川有功歷陞廣西右江鎮總兵

田永桐字子盛父震雍正癸丑武進士仕至陝西固原遊  
擊幼隨任所器宇不凡言動不苟父甚奇之授以儒書及  
孫吳兵法輒闇解如夙習者乾隆庚辰年十九舉鄉榜癸  
未成進士授三等侍衛三十四年補廣東揭陽遊擊時有  
妖婦馬王氏倡亂約夜半攻城守城官以兵少議不列炬  
永桐令徧搽竹木葦索油脂燈燭等具然之環置睥睨間  
賊遠望惶遽反走有欲乘勢放大礮者永桐以城外居民  
鱗次不可率兵出城擊賊旋平四十六年擢廣西全州



參將五十年擢平樂協副將以母憂歸服闋補河東中營副將五十九年陞雲南臨元鎮總兵湖南苗匪滋事總統滇兵策應賊匪滋擾岑洞一帶督率官軍截擊斃賊無數生擒十名獲首級八十以軍功戴花翎嘉慶元年苗匪蟻聚數千人窺撲木樹率兵痛殲焚燬窩棚搶獲器械並擒石六保等三十二名議叙加級二年移駐銅仁又調赴南籠協勦犛苗多所斬獲九月調補江南蘇松鎮總兵旋改河南南陽鎮總兵駐札襄江北岸防堵四年陝省賊匪竄入豫境相度地勢以青山黃土嶺犬牙交錯爲陝匪來路遂合所部兵駐守於此九年教匪肅清始回任十一年寧陝叛匪滋事駐川之西坪鎮防守十三年陞江南提督十四年祝

嘏京師聽劇陪宴 賞賚優渥十五年夏以痺患左偏艱於動履陳請解任就醫吳門終於寓廬年六十九歲子銳廕生現任江南淮安府通判

宋良佐少豪俠膂力過人舉乾隆癸卯武魁第一効力撫標補太原左營把總有馬奔蹠不受鞮鞞良佐馭之甚馴嘉慶元年隨總鎮入川剿滅教匪恒跨此馬提撲刀所向

披靡無敢敵者以軍功拔萬泉千總四年賊攻陳家灣良  
佐奮勇截殺歿於陣越數日而馬亦死事聞優恤如例而  
勇敢之名未著嗣擒賊首劉之協解京

睿皇帝廷訊據供有自陳家灣殺死宋撲刀便無懼怕等語奉  
旨由川查取職名乃知卽良佐也諡昭武將軍入祀昭忠祠世  
襲雲騎尉罔替子庭芝承襲補汾州營守備陞貴州新添  
營都司

王嘉猷少爲書吏有至性喜揮霍援例授四川從九以軍  
功擢知縣川匪名姑嫂者爲害滋甚嘉猷嚴爲懲創奸宄

陽曲縣志

卷十三

人物列傳

六十五

屏息俸滿保薦漢州知州決獄精當廉能益著丁內艱服  
闋值川逆之變時嘉慶二年也上憲命守糧臺賊匪猝至  
家人勸其逸嘉猷曰吾與糧臺共存亡安敢擅離去此一  
步非死所矣遂罵賊遇害姪恒從亦死事聞廕雲騎尉恒  
亦贈恤如例

張得鳳蒲州協把總嘉慶二年在四川夔州府放牛廠與  
賊匪打仗陣亡事聞世襲雲騎尉又恩騎尉世襲罔替祀  
昭忠祠

崔德寧由順天宛平籍拔補太原撫標千總遂隸籍陽曲

歷陞隰州營都司嘉慶元年檄赴川陝等處協剿教匪劉之協等前後打仗八十餘次二年十二月十二日在四川開縣回龍廠打仗受傷四十一處陣亡事聞贈恤如例祀昭忠祠子映宸襲雲騎尉世職候補守備

李攀龍大同威魯堡千總嘉慶二年出征川楚在西鄉馬家灣打仗陣亡予雲騎尉又一恩騎尉世襲罔替祀昭忠祠

王浩太原營兵嘉慶年征川匪陣亡祀昭忠祠

郝全撫標右營馬兵嘉慶年征川匪陣亡祀昭忠祠

陽曲縣志

卷十二

人物列傳

六十六

車義由行伍洊陞大同千總嘉慶初教匪滋事檄調四川軍營以功除行營守備部下兵糧匱乏義以已俸分給凱旋雲兵爲製恩同父母匾嗣署代州守備有兵丁應領埋葬銀兩歷任未發義竭力查辦盡數發給以老乞休家居十餘載甘貧力食年七十五卒

賈薇垣名樞以字行邑諸生與弟樹皆有聲庠序少孤貧粗糲自甘舌耕度日叔父母年與相若事之如父母叔服賈失業竭館穀以養終不忍析爨視叔子如同胞訓誨成立叔母年六十稱觴每上食拜跪必與諸弟同列鬚髮蒼

然叔母亦安受不辭蓋習以爲常云年近六旬躬執勞役  
每日將明結束如傭保狀荷擔汲水於市返乃著衣赴塾  
偶染疾不思食家人爲市甘饅物食之不肯曰叔父母未  
食此吾何能下咽未幾叔父母病疫卒執喪不勝憂悴亦  
卒

程德明古城人家素豐勤儉自持好施樂善鄉人每於農  
事畢業爆竹爲生無資者資之有出外貿易者必助其旅  
費里中游手捨業之人無不望而思避懼其勸且責也遇  
婚喪不能舉者求則必應尤樂成守節之人歲歉則以修

陽曲縣志

卷十二

人物列傳

六十七

地爲名無老幼咸給以食而鄉人習以爲常渾忘其用意  
之所在也若德明者亦足風矣以子武進士萬里貴封武  
德騎尉壽八十九歲終

劉達字通儒馬莊人天性純篤髫齡事親能得其歡心長  
棄儒服賈而定省孺慕之誠無時或懈事兄撫弟敬愛交  
至教子課孫尤嚴明不少貸處鄉里一以和睦爲先貿易  
中州日有陳州營都司王某大同人也交最久會川逆猖  
獗王奉檄赴軍營瀕行執手流涕以妻子並橐金千餘托  
達達卽慨然自任已而王沒軍所達收其遺骸出所寄金

益以息還其妻子護送歸里人咸義之其重然諾尚氣節  
如此援例布政司經歷職享年七十有七子裕元敦品持  
家有父風

張承志字繼善字文村人孝廉正誼之父也喜讀書家貧  
少孤不得已棄儒業商暇則手綱鑑一帙見古人忠孝事  
輒筆而授之子鄰有將鬻妻者承志給粟贍之爲覓生計  
俾夫婦偕老焉鄉里遇有失和事曲爲排解一鄉中不興  
訟者三十年亦罕得之事也

張廷彬本城人少貧甫三歲父瑛貿易宣府二十載無音

陽曲縣志

卷十二

人物列傳

六十八

耗母加氏因憂成疾與母寄養於外家泊長日夜勤勞積  
資娶古氏古善持家事姑孝彬毅然曰吾今可以尋吾父  
矣至宣府年餘不得父耗囊空乞食遇一農夫叩之乃其  
胞兄也兄名廷材十四歲出尋父始知父在張家口賣藥  
同鄉賈君輔憫其孝助以費使先歸至家拜母母疾得愈  
嗣父兄同歸一堂孝友無間言其外戚祖母關氏無所依  
廷彬迎養於家旣歿買棺葬之今其孫曾蕃衍人以爲孝  
義之所致云

魏全唐趙庄人大行六拐一足人呼爲拐老六貌極樸而

至性過人母歿哭泣盡禮父廣年老而昏每無故出村外  
或之河干全唐聞之卽輟業扶掖歸啜菽飲水能得歡心  
會邑紳修學宮全唐供力役三年不辭勞瘁不受工資家  
素貧體羸三十外始有室生一子頗穎悟能文年十八亡  
全唐曰天也村西有河灘地千餘畝久爲河水所沒後水  
落地出全唐招夫疏渠貼榜鄰村俾各認地遂得底冊繪  
地圖分垧頭插籤挨丈有無多寡一秉至公時有就中取  
利者乘夜拔籤唆地主誣控全唐冤無所白賈志以沒  
宋獻廷西張村人少孤事母至孝好施予乾隆六十年亢

陽曲縣志

卷十二

人物列傳

六十九

旱捐穀百石賑饑

恩賜八品頂帶八十一終

張榮貴西鳴村人年四十無子相者多以孤獨論性最孝  
十七失怙母王氏病五載不愈躬侍湯藥晝夜不倦四十  
後連舉三子親見孫曾八十九歲

恩賜粟帛孫大任

邑庠生

劉昌諸生高村人年十五父歿以力田事母與妻連氏能  
得母之歡心服勞之暇輒讀書二十一歲入庠工易數束  
身修行無事不可對人言里黨交推之

郭天申字君佑翟村人南固碾村起建石壩趙庄小河木

橋鎮城村車路皆資以成功壽八十卒

張永興字鴻業新城人嗣伯父邑庠生世傑生父卒與雨幼弟每食必偕村外河水暴至興率夫捍禦水急漂二人去興急跪帝君前默禱河水驟減二人獲無恙後增築堤防并割已地以寬道路村中恃以無恐

黃守忠西鳴村人家粗裕四十無兒散債券百餘紙約千餘金有不及散者焚之遂連舉三子今稱蕃衍矣

孫炳高青龍鎮人一日見十數人縲紲過其門詢其故俱欠錢糧者炳高出銀悉代納之縣令給赤効國籌匾

陽曲縣志

卷十二

人物列傳

七十

張林春西鳴村人庠生張焯之父也善醫學尤精針灸有以病延請者無風雨晝夜必赴路雖遠不假車馬所到不輕一飯貧富貴賤藥不受價有病者投門必欸以飲食盧其孱之不勝也昆弟七人同居家人九十八口未嘗有違言卒年八十餘歲

張永節馬莊人慷慨好施乾隆初年歲荒永節積米五十餘石高糧八十餘石錢二百餘千盡出以賑村貧至次歲麥秋資甫竭而貧人亦收麥不求濟矣至今稱之

張學舜高村諸生性孝友親老朝夕侍左右父邁疾嘗藥

不解帶者累月及歿痛絕數次葷酒不入口事母色養備至幼與弟殿元同學飲食寒煖曲體之殿元入泮後嘗曰吾兄愛我無異父母其孝友如此家設義學課村中子弟不計脩脯子天錫亦庠生年六十四卒

張光祖字宏業歲貢介之子也仁厚睦族乾隆初年歲歉出千金煮粥賑饑鄉鄰德之

黃天福東留莊人乾隆年南寨村石橋凌井溝好漢道皆資其力以修整白雲洞黑漆崖爲忻代往來要路山谷峻險行旅苦之天福糾工鑿石以平四年工始竣行人稱便

陽曲縣志

卷十二

人物列傳

七十一

後無疾而終鄉人立碑誌之嘉慶十五年其孫玉鼎募銀五百餘兩重修南寨橋道光八年募銀百餘兩重修黑漆崖道並建 關帝廟能嗣其善舉

文奎字魁吾居府西街工製筆造墨中年失偶子槐卿爲續某氏婦至期奎往迎之聞其姑媳相泣不忍生離曰此孝義婦也因以所持錢予之市屢拾遺皆訪而還之壽八十一無疾而終

宋大章楊家井村人事繼母以孝聞村東溝有二小道夏雨暴發人馬難行大章每於秋後補修數十年無少怠



鄭必揚東黃水村人廩生礪志讀書手不釋卷十九入泮  
旋食餼教授生徒諄諄以孝弟爲先遊其門者文行皆有  
可觀選貢後授安邑訓導課士如家塾任滿歸田課孫曾  
等今名列膠庠者三登賢書者一卒年八十六歲

唐宗湯字式九性孝友樂善好施七十一歲得見元孫五  
世一堂子二長峻武舉次對浙江桐鄉尉孫六曾孫一先  
甲進士元孫一乾隆五十年蒙 旌賞給鳩杖荷包黃  
馬褂 盛世康齡匾

郭天隆蘭岡村人年八十五歲五世一堂乾隆年巡撫覺

陽曲縣志

卷十二

人物列傳

七十二

羅海寧上其事給 熙朝壽考匾榮之赴千叟宴卒年  
九十七

張林旺西鳴村人七十八歲五世一堂方伯葉給匾榮之  
楊守金呼延都人福建撫標遊擊子尉孫春郁曾孫全浙江  
湖州協都司元孫慶昌守金故其妻吳氏壽九十四歲五  
世同堂嘉慶六年慶昌生子霖尉壽八十五歲得撫元孫  
嘉慶二十四年霖生女春郁壽八十六歲得見元孫女三  
代五世同堂堪稱人瑞

王蘭楊家井人八十八歲得見元孫五世一堂壽九十一

歲卒

張大選新城村人武生壽九十一歲親見元孫五世一堂  
武文壘小峪溝人子秉忠耆賓孫現奇庠生曾孫開烈元  
孫鳳鳴耕讀傳家五世同堂九十二歲卒

劉澄本城人幼勤儉甘淡薄常以惜物居心生於康熙四  
十九年嘉慶十六年卒壽一百二歲

連贊連家嶺人生平孝友年九十得見元孫五世同堂

陽曲縣志卷十三終

陽曲縣志

卷十三

人物列傳

七十三

